



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma : Tir Yimym

tiryimym@aolima

tir yimym

TAPAK 8

Ato kilonser Modi aser Greece Tir, Katerina na senden amen

National Sports Day nungtem nung YRS-i athletic competition ayongzük

VOL. XX NO. 314 (ADOK 314) DIMAPUR

KÜPTOKNÜ (SATURDAY)

LUROI (AUGUST) 26, 2023

₹ 5.00

Nagaland sorkari Hutah Industries den PPA sign sütep

Kohima, August 25, 2023 (TYO): Hokolbarnü Kohima nung Nagaland sorkar aser M/s Hutah Industries tsungda Power Purchase Agreement (PPA) ka nung sign sütepego.

PPA ya A.K. Industrial Village, Ganeshnagar, Nagaland nung aliba 10MW Biomass Power Plant nungi power alizüksü atema lir. Iba mapa ya M/s Hutah Industries-i IPP (Independent Power Producers) mode nung inyaktsü.

“M/s Hutah Industries-i iba mapa inyakba atema kanga pelar” ta Power & Parliamentary Affairs Minister K.G. Kenye-i ashi.

Nagaland nung power generation mapa inyaktsü nungdaker. Asenok kidang atsüksüba dang masü saka industry maparen inyaktsü atema power nungdaker aser iba ajanga tangalen nungi power alia atsükba ajemtsü, ta pai ashi.

Iba mapatong ya aou indang asünung Nagaland Bamboo Development Agency (NBDA) den tesentaktep inyakra lanurtem

mapa inyakdak angutsü ta Minister Kenye-isa ashi.

“Power plant ya bamboo fired plant asütsü aser mapatong inyakba tesem nung aou tsünüsü” ta M/s Hutah Industries CEO & CFO Aditya Pandit-i ashi.

“Küm 25 atema ali acre 1500 lease nung amshitsü tenangzüktep agiogo. PPA sign asüba sülen ita 24 tsungda mapatong renemtsü” ta paisa ashi.

“Tesüiba nung Power Department-i PPA aika sign sütepego saka IPP aikati mapa shitak meinyakteter. M/s Hutah Industries den PPA sign sütepeba yagi mapatong takok ngua inyaktsü imlar” ta Power Department Engineer-in-Chief Moa Aier-i ashi.

PPA sign sütepeba sentong nung mendenji Chief Engineer (T&G), Penrithung Yanthan liasü, Kohima Baptist Pastor’s Fellowship Rev. Vezopa Rhakho-i temoatsü meshia sarasadem aser Additional Chief Engineer (T&G) Kasho Chishi-i anküp tepela o jembii.

Hozheto Yeptho tepsetsang puogo

Dimapur, August 25, 2023 (TYO): August 24 nü Inter State Bus Terminal complex, Purana Bazaar nung sorkar mapa inyakker ka tepsetba nung tongti süa tai tongloksüasang puogo.

Hokolbarnep Mon bus station nung police-i iba nisung apu. Pa ya Noknyei Konyak (24) ta jangjaogo aser pa Honibarnü Dimapur-i anir arutsü.

Brihostibarnep ISBT complex nung Hozheto Yeptho (58) tepseter lia angu. Pa ya Nagaland State Transport department nung night watchman ka ama inyakka liasü. Dimapur police-i mapang shitak nung nisung tepseter apuba atema Dimapur Sumi Council-i tenüngsang agütsüogo aser ozüing tapet agi merenshitsü ayongzükogo.

Asen loktiliba nung iba ama mapa tamajung meinyakdaksütsüla aser tangatetba shitak alir ajaki aitsütsüla ta Dimapur Sumi Council-isa ashi. Konyak Union (KU)-ia tanga sangdong ka nung Yuching nung aser Phongkai Konyak’er jabaso Noknyei Konyak ozüing tesashitaba agi

merenshitsü metetdaksüogo.

August 24, 2023 anepdang ISBT, Purana Bazaar nung staff Hozheto Sema kanga mejungi tepsetba atema onok kanga aoksar aser temulung raksar. Onoki asür kibong den asükuh lemsateper aser mangyimer ta Tir Tingthok Konyak aser Tongti Tezülur Manpang K Wangyen nati sangdong nung shia lir.

“Phongkai Konyak ya drug achir ka lir aser mapang shia ozüing alema inyakshangshir ta onoki osang angazükogo. Iba tatalokba ajanga asen loktiliba nung drug khuret azüoktsü atema asenok nenshir. Iba ya tang mezüing masü saka May 25 nü Tizit nunga drug dak sendakba tatalokba ka nung kaketshir lennir tajung ka taküm samaba asenoki bilemteter” ta KU mendenpurtemisa ashi.

Nagaland sorkari kanga rongdak nungdak ta bilema asen loktiliba nung drug khuret anema mapa inyaktsü ayongzükker. Sorkari drugs azüoktsüla aser tarutsü nung lendong mataloktsü atema mapa inyaktsüla, ta Konyak Union-isa metetdaksü.

Amit Shah-i COCOMI dang Kuki nunger den olemteptsü ashi

New Delhi, August 25, 2023 (Agencies): Union home minister Amit Shah-i Coordinating Committee on Manipur Integrity (COCOMI) dang Kuki lennirtem aser teloktem den olemteptenzüksü shiogo.

COCOMI nungi teshimtet nübotemi August 25 nü New Delhi nung union home minister Amit Shah den ajuruteper.

Senden amenba sülen COCOMI-isa Intelligence Bureau (IB) nung tongti ketdangsurtem den senden ka amen.

Manipur litsü telungi ozüing alema nisungtem aruba akangakanga noktangtsü atema Union Home Minister-i ashi ta COCOMI ajanga metetdaksü.

Tangalen nungi arurtem retina scans dena biometrics amshia zülüoktsü aser ozüing alema aruba inyakyim noktangtsü atema Amit Shah-i parnok dang ashi.

Centre sorkari Manipur sector nung nisung telok aruba khuret atema arrtsü nung atsü atsüdangba mapa inyakker aser Manipur nung ketdangsubaren

Dr. Yhome-i NSF nungshilung sayatsü; Ketdangpur tasen shim



August 25, 2023 nü Ukhru Naga Students' Federation (NSF) o buba lokti mungdang nung 2023-2025 kümsük atema ketdangpurtem shimba sülen agiba noksa ka angur.

Ukhru, August 25, 2023 (Agencies): Brihostibar nungi Ukhru Headquarters nung Naga Students' Federation (NSF) 30 buba lokti mungdang tenzükogo.

NSF president, Kegwayhun Tep den külemi federating units nungi tirtemi mungdang tenzükba anogo nung NSF wako atsüket.

Hokolbarnü Nayi Kaphung, Ukhru nung School Education and SCERT, Nagaland Advisor Kekhrielhoulie Yhome-i NSF Conference 2023 indang nungshilung ka sayatsü.

“Nagaland, Assam, Arunachal, Manipur nungi Naga lennirtem den külemi shilem agiba ya ni atema maangka ka lir. Iba nungshilung ya teti

bilemtetsü. Iba nungshilung ya asen nübortem teimla, pungmang sentsüwangshitsü atema ni sayatsür. Iba nungshilung ya Naga nunger ka ama aliba aser tarutsü anogotem atema lir” ta Dr. Kekhrielhoulie Yhome-i ashi.

1947 küm tentetba sülen nungi NSF-i “Naga nunger ya ka dang aser linük ka dang” ta asüba tangatetba nung noktaker inyakka arur, ta paisa ashi.

Hokolbarnü 2023-2025 kümsük atema NSF ketdangpurtem shim:

President - Eno Medovi Rhi (Chakhesang Students Union)
Vice President - Mteisuiding Heraang (All Zeliang Students Union)

General Secretary - Chumben Khuvung (Lotha Students Union)
Assistant General Secretary - Kenilo Kath (Rengma Students Union)

Education Secretary - Temjen Toshi (Ao Students Conference (AKM))

Finance Secretary - Heikho Rengma (Rengma Students Union)

Information and Publicity - Pitongo Shithou (Lotha Students Union)

Social and Cultural Secretary - Kaisu Chakre (Mao Students Union)

Speaker - Kato P. Awomi (Sumi Students Union)

Auditor General - Kawoka V. Awomi (Sumi Students Union)

Union Minister Yadav-i Ngwalwa nung 'Oil Palm Field' semdang

Peren, August 25, 2023 (DPRO): Union Minister of Environment, Forest & Climate Change, Labour & Employment, Government of India, Bhupender Yadav-i Hokolbarnü Peren district nung Oil Palm Field semdang.

Minister Yadav-i Ngwalwa nung aliba Oil Palm Field semdang Village Council den ajurutepe onük aika lemsatep.

Iba mapang pai Jal Jeevan Mission indang osang metetpela aser yimdaklirtemi water tap connections anguba indang asügang.

Union Minister-isa Pradhan Mantri Ujjwala Yojana (PMUY) indang jembidang iba ya Below Poverty Line (BPL) nung alirtem nem cooking LPG gas agütsütsü atema inyakker ta ashi.

Ngwalwa Village Council-i Minister Yadav dang parnok yimtsüing nung kilen shiai item scheme teyari anguba metetdaksü.

Külen, Nagaland Environment, Forest, and Climate Change Department-ia Union Minister aruba atema yashi ketdangsurtem den sensaksemba sentong ka ayongzükba agiogo.

Iba sentong ya August 24, 2023 nü Jalukie Range Office nung agi aser Environment, Forest & Climate Change Minister C.L. John menden liasü.

“Linük nung Peren district ya kanga tongtipang lir kechiyong iba nung sobaliba senmang tajung lir” ta Minister Bhupender Yadav-i ashi.

“Self-help groups-i district aser state nung rongsenketzüing terenlok alitsü atema mapa inyaktsüla. Self-help groups maparen ajanga loktiliba nung rongsenketzüing jenjang ajungketer aser terenlok bener

arur” ta paisa ashi.

“Forest department-i self-help groups den yaritepa district nung lipoküm wazüka ayuba atema pelar. Chief Minister Neiphiu Rio-i mangdang tajung yur state ajungkettsü aser renloktsü mapa inyakba atema tenüngsang agütsür” ta Minister Yadav-isa metetdaksü.

Paisa Public Park cum Botanical Garden ka lapoktsü aser self-help groups ajanga lapokba stall sema senzü.

Iba sentong nungsa King Chilli Cluster product, Doyang Wetland Compendium aser Nagaland nung ozütem indang interactive posters sayatsüogo.

“Prime Minister Narendra Modi lenisüba kübok sorkari mapa aika inyaktetogo. India nunger kibong crore 13.5 tashi sensaktia nungi middle class-i ajungketogo” ta Minister Yadav-i Peren district nung Heads of Offices den senden amendang ashi.

Paisa district ketdangsurtem dang sorkar scheme temi nübortem atongtsü atema maongkatem jangjatsü aser metokmeperi alibatem reprangshimtsü ayongzük.

NDPP ajanga Ketusiëü Kathipri asükhu lemsatep

Dimapur, Luroi/August 25 (TYO): Nagaland Chief Minister Neiphiu Rio kinungtsü Kaisa Rio tetsü Ketusiëü (Atso) Kathipri, Kohima nung August 24, 2023 nü asüba osang angashia kanga jashir, ta Nationalist Democratic Progressive Party (NDPP) sangdong ka ajanga ashi.

Ketusiëü ya nurse liasü aser la mapa inyak piyong shiranger dang temeim sayua aser takum bendanga agütsü nendaka inyakba ajaki meteta lir.

Küm aika kibong anepalua

anitetba tetsü ka asüba ya chirnurtem aser kibong asoshi takoksa tulu lir, ta NDPP Tir Chingwang Konyak-i sangdong ajanga ashi.

Ni aser kü kinungtsü den NDPP ketdangsür temi 'Madam' aser Chief Minister den asükhu lemsateper.

Tulusang Tsüngremi mangyimer kibong nem anisüngzük agüjangma aser asür tanüla teti tatem maka tesunep nung anisüngzükjangma, ta sangdong ajangasa ashi.

NSCN/GPRN ajanga asükhu lemsatep

Dimapur, Luroi/August 25 (TYO): Anojungi Asalu (ZLR) Region, GPRN indang Tatar, Hailakle Riame shiranga August 21, 2023 nü asüba aser Ino Samuel Pongen, Leacy of UT (Union Territory), GPRN shiranga August 23, 2023 nü asüba angashia National Socialist Council of Nagalim (NSCN) aoksar, ta NSCN/GPRN sangdong ka ajanga ashi.

Parnoki bendanga agütsü

mapa tajung inyakba NSCN-i kodanga mamadoktsü. Parnoki Naga lima meimba asoshi par tenüng Naga nungur puti otsü nung teti alitsü.

Mangyimer kibong aser tembartem den NSCN/GPRN ajanga asükhu lemsateper aser item takoksa koktetsü asoshi tashi agüjang ta sarasademtsür. Asür tanülatem teti tatem maka tesunep nung anisüngzükjang, ta NSCN/GPRN sangdong ajangasa ashi.

IPR ketdangsüri Armstrong Pame ajuru



Director IPR, Govt. of Nagaland, Dzüvinuo Theünuo aser ketdangsür temi August 24, 2023 nü Shastri Bhawan, New Delhi nung Director (Films), Ministry of Information & Broadcasting, Armstrong Pame, IAS ajurudang tangokba noksa nung angur.

Dimapur, Luroi/August 25 (TYO): Information & Public Relations (IPR) Department, Government of Nagaland nungi Director Dzüvinuo Theünuo-i anir ketdangsür temi August 24, 2023 nü Ministry of Information & Broadcasting nung Director (Films), Armstrong Pame, IAS ajurua liasü.

Iba senden ya New Delhi nung aliba Shastri Bhawan nung mena liasü, kong Nagaland nung film terenlok asoshi ken o balala

jembi.

Iba senden nung Theunuo-i Ministry of Information & Broadcasting dang Nagaland nung film industry aintsü nükjidong nung sentong balala ayongzükba atema pelaba lemsatepa liasü.

Talisa Cannes Film Festival 2023 nung Nagaland nungi 'film personality' ana shilem agitsü asoshi Ministry ajanga yaritepba atema lai pelaba lemsatepa liasü.



Police Station I



Police Station II

Mokokchung nung aliba Police Station I & II ajanga August 24, 2023 aser August 25, 2023 anogotem Community Outreach Programme ayongzükba liasü. Temesepba mozü achiba/shibelenba, cyber safety, tanur/tetsür kumzükba ayuba, auyaba, yi jemer gari aniba tebilemstü azüoktsü asoshi police aser nüburttem tsüngta tesendaktep tajungba lia yariteptsü nükjdjng nung iba sentong ya ayongzükba liasü. Iba sentong nung Ward Chairmen, secretary aser züngsemtem dena liasü.

ATMA Chuchuyimlang Block ajanga aluyimer nem training agütsü



Dimapur, Luroi/August 25 (TYO): Agricultural Technology Management Agency (ATMA) Mokokchung, Chuchuyimlang Block ajanga August 24 & 25, 2023 anogotem Chuchuyimlang nung Training and Demonstration Programme ayongzükba liasü.

ATMA Chuchuyimlang Block ajanga sangdong ka nung ashiba agi, 'Awareness of Cole Crops Physiological Disorder and its Control' indang training ya shisalen sayur Aolemla Kichu, Block Technology Manager, Chuchuyimlang Block ajanga August 24, 2023 nü Chuchuyimlang yimdak agüja liasü.

Cole Crops dak tali rangloker aonsotsü adokdaksütsü asoshi lenmang balala sayua liasü. Cole crops balala nung kanga

bulua anguba 'Physiological disorders' indang lai rateta ashi aser temji azüoktsü lenmangtema sayua liasü.

Iba training nung aluyimer 26 shi dena liasü aser iba sülen shisalen sayur Tangit Longkumer, Assistant Technology Manager, Chuchuyimlang Block ajanga French Beans züsentsü indang yimyatem sayua liasü.

Pai French Bean ali nung yoktsü, ali renemtsü, wazüka ayutsü meratem sayu aser North Eastern tsütsü tenem aliba tesemtem nung iba aonsotsü mozü mamshi junga adoker, ta ashi.

Ano August 25, 2023 nü shisalen sayur Abenla B Jamir, Assistant Technology Manager, Chuchuyimlang Block ajanga Knol Khol züsentsü yimyatem

sayua liasü.

Lai iba mapang Knol Khol atema alu renemba aser nursery bed renemba sayua liasü. Nursery bed ketdangsüba mapang anepalutsü yimyatem lai sayu.

Iba sülen kasa anogosa ATMA Chuchuyimlang Block ajanga FOCUS DMU Mokokchung den senden ka mena "Training on Application of Bio Fertilizers" onük nung training agüja liasü.

Iba sentong nung shisalen sayur Abenla B Jamir, Assistant Technology Manager, Chuchuyimlang Block ajanga bio-fertilizer pezü - Azotobacter, Azospirillum, Rhizobium aser Phosphotika indang rasaa ashi.

Laisa item ali temo nüngdak balala nung amshitsü asoshi yimyatem sayua liasü.

DEO Kohima ajanga Shaala Siddhi indang orientation agütsü

Kohima, Luroi/August 25 (TYO): District Education Officer-cum-District Project Coordinator, District Mission Authority (DMA) Samagra Shiksha Kohima ajanga Hokulbarnü Ura Academy Hall, Kohima nung School Self Evaluation on Shaala Siddhi indang orientation sentong ka ayongzükba liasü.

Iba sentong nung Kohima district kübok school 169 nungi teshimtet nübu arua dena liasü, kong shisalen sayur ya Joint Mission Director State Mission Authority (SMA) Dr Chumbeni

Kikon; State Coordinator SMA, Rukuzo Hoshi aser PGT RGHSS Kohima, Orenvungo Yanthan nungertem liasü.

Iba sentong nung DEO-cum-DPC DMA Kohima, Emilo Patton-i jembidang shisaliok ya tanen makai angazükba yimya ka lir aser tanü shisaliok tsütsü kakete reju ya tongtipangtiba lir, ta ashi.

Kakete reju junga ketdang masü tashi shisaliok tajung malitsü aser kaketshir indang shisaluyim nung school tekolak aser tesayuri tongti shilem agir aser kakete reju nung atalokba ajak parnok mapa lir, ta ashi.

Kakete reju nung ken o aser tayongzükba balala lir, anungji kakete reju temi item tayongzükba ya maongka

kumdaksütsüla aser kakete reju nung temelenshi tajung bener arutsütsüla, ta lai ashi.

Kakete reju nung takok angutsü asoshi shisaliok tajung alitsüla, anungji kakete reju nung tanen makai renloktsü asoshi Shaala Siddhi ya tenzük, ta lai ashi.

Shisaliok lenla ajaklen tajungtiba nung takok angutsü asoshi iba ya ajanga kakete reju tem kibur kumdaksür aser kakete reju ajak atema Shaala Siddhi ya tongtipang hadir ka kumogo, ta lai ashi.

Iba sentong nung Project Assistant DMA, SS Kohima, Ruokuoneinuo menden liasü aser Project Assistant Peteneilhou-i melepzüng o jembi.

Kohima nung pensioner tem physical verification agitsü

Dimapur, Luroi/August 25 (TYO): Kohima South Treasury nungi life pensions aser family pensions agizükba pensioner ajak dang fiscal year 2023-2024 asoshi Annual Physical Verification alitsü metetdaksüogo.

Iba verification maparen ya September 11 nungi September 16, 2023 tashi DC Office compound nung aliba South Treasury Office tasenba nung agitsü. Anungji pensioner tem office mapang tsüngtong arutsü

metetdaksür, ta sangdong ka ajanga ashi.

Iba maparen atema pensioner temi Pension Payment Order (PPO) Book, Renewed Non-Practicing Allowance (NPA) ID Card, Life Certificate aser Non-Marriage Certificate bener arutsüla, koba Treasury Office ajanga agüja lir.

Item kulizüng kakete medeni physical verification atema arura pension payments anentsütsü, ta sangdong ajangasa ashi.

Ato kilonser Modi aser Greece Tir, Katerina na senden amen



August 25, 2023 nü Ato kilonser, Narendra Modi Athens International Airport, Greece atongba sülen Greece Minister of Foreign Affairs, George Gerapetritis-i pa agizükba noksa nung angur.

Athens, August 25 (Agencies): August 25, 2023 nü Greece yimtiba, Athens nung Ato kilonser Narendra Modi aser Greece Tir, Katerina Sakellaropoulou na senden menogo; iba mapang nungji lai Chandrayaan-3 mission takok anguba atema India nem tenüngsang agütsü.

Tesüiba küm 40 tsüngda Greece semdangba India nung Ato kilonser mezüngbubaji Narendra Modi asütsü.

Modi-i twitter ajanga, "Athens nung Tir Katerina Sakellaropoulou ajuruba atema pelar. India-Greece tesendaktep tajungba akümtsü atema künati onük aika nung o lemtepogo. Künatisa terenlok ajungkettsütsü atema jembi. Chandrayaan-3 mission takok anguba atema lai India nem tenüngsang agütsüogo," ta metetdaksü.

Ato kilonser Modi-isa, "Chandrayaan-3 mission takok

ya India kija masü saka alima nung meimchir ajak takok lir," ta metetdaksü.

"Chandrayaan-3 mission ajanga bendenba 'data' ajanga scientist tem aser meimchir ajak ajangzüksü," ta paisa metetdaksü.

Tena senden amenba sülen Tir, Sakellaropoulou-i Modi nem 'Grand Cross of the Order of Honour' agütsü.

Modi-i twitter ajanga, "Kü nem 'The Grand Cross of the Order of Honour' agütsüba atema ni Tir Katerina Sakellaropoulou, Greece sorkar aser nüburtem dang pelar. Iba ya ajanga Greece-i India nung akhümtsübuba sayur," ta metetdaksü.

Hokolbarnep Modi Johannesburg nungi Athens tonga aruba sülen pai 'Tomb of Unknown Soldier' nung akhüm agütsü. Iba leper ya rara balala nung asür Greek nung sepaitem nem akhüm agütsütsü

atema asürtem nungtem nung yangluba lir.

Ato kilonser Modi-isa Greek nung business lenirtem, yangji aliba India nungersentotem aser nungtugu nisung aika ajuru.

Anogo asemnü tashi Modi South Africa nung 15buba Brics senden nung adenba sülen Hokolbarnü Greece-i ao. Pa airport atongba mapang nung Greek Foreign Minister, George Gerapetritis-a pa agizüka liasü.

Modi-isa Ato kilonser Kyriakos Mitsotakis den-a senden menogo.

Senden tembangba sülen Modi-i twitter ajanga, "Athens nung Mitsotakis den senden takok ngua menogo. Asen linük ana nüburtem tajangzük angütsü atema künati linük ana tesendaktep ya asalentong Partnership-i ajungketogo. Künati defence, security, infrastructure, aluyimba aser skills densema onük aika nung o lemtepogo," ta metetdaksü.

Chandrayaan-3-i ita nungi yokba osang ajanga alima ajangzüksü: Murmu

New Delhi, August 25 (Agencies): Hokolbarnü linük Tir, Droupadi Murmu-i, Chandrayaan-3 ajanga ita nung ngutetba osangtem ajanga alima ajak tajangzük angütsü, ta ashi.

Rashtrapati Bhavan Cultural Centre, New Delhi nung taoba mapang Brahma Kumaris tongti, Dadi Prakashmani nungtem nung postage stamps sayatsüba sentong nung jembidang lai India nungerscientist tem nem tenüngsang agüja, "India nungerscientist tem takok ajanga ita nung South Pole tongtetba mezüngbuba linükji India kümogo," ta ashi.

Tesülen Rashtrapati Bhavan sangdong ka ajanga, "Lai (Tir Murmu) Chandrayaan-3 mission ajanga ita nungi osangtsüsang tasen aika angütsü, aser ibaji ajanga alima ajak tajangzük angütsü imlar ta shiogo," ta

metetdaksü.

Taoba mapang Brahma Kumaris tongti, Dadi Prakashmani nungtem nung adokba stamps ji Department of Posts, Ministry of Communications indang 'My Stamp' mapatong kübok adok.

Tiri, Dadi Prakashmani-i India nungerslibaliro aser sobalibaji linük nung dang masü saka bendanglen-a prokshia liasü, ta metetdaksü.

"La lenisüba kübok Brahma Kumaris ya alima nung tetsürtemi aniba tanela tsütsü organisation tulutiba aküm. Chichiba lenir ka ama lai Brahma Kumaris kibong meim aser tayongzükba balala ajuruba mapang nung tasüita nokdakba den külemi la len ania liasü," ta Murmu-i ashi.

Tiri, "Alima nung ochi o tulutibaji- taküm ya khenpiga atema dang, ajisüaka nisung ka bilemtetbaji pa/la mapatem ajanga bilemteter," ta ashi.



August 25, 2023 nü Rashtrapati Bhavan Cultural Centre, New Delhi nung taoba mapang Brahma Kumaris tongti, Dadi Prakashmani nungtem nung postage stamps sayaba sentong nung linük Tir, Droupadi Murmu, Union Minister of State for Communication, Devusinh Chauhan, Brahma Kumari Asha aser BK Brij Mohan nungersadenba noksa nung angur.

Russia Tir Putin G20 senden nung adentsü atema India-i marutsü

Moscow/New Delhi, August 25 (Agencies): Taruba ita New Delhi nung G20 lenirtem senden nung adentsü atema Russia Tir, Vladimir Putin India-i maotsü, ta Kremlin otongdar Dmitry Peskov-i osangbenertem nem metetdaksü.

Tawa Putin-i South Africa nung ayongzükba BRICS senden nunga maden,

ajisüaka video link ka ajanga dang iba senden nung jembia liasü. Taküm G20 Tirji India lir aser G-20 senden ya New Delhi nung September 8 nungi September 10 tashi agütsü.

Taküm March ita nung International Criminal Court (ICC)-i Russia Tir Putin aser Russia nungersketdangser ka aputsü atema tetuyuba agüja lir.

Ukraine nung rara mapang ozüng alema inyakbatem atema Putin aija lir.

ICC-i, Russia Tir Putin aser Russia Tir office nung children's rights commissioner, Maria Alekseyevna Lvova-Belovana nungers tanurtem tashiyim agi Russian-occupied territory nungi Russia-i yok, ta aija lir.



August 25, 2023 nü Jaipur nung Commerce & Industry Union Minister, Piyush Goyal G20 Trade & Investment Minister tem senden nung adendang tangokba noksa nung angur.

Bihar, Assam aser Meghalaya nung tzünglu sashia arutsü: IMD

New Delhi, August 25 (Agencies): Hokolbarnü India Meteorological Department (IMD)-i, August 25 nungi August 27 tashi Assam, Meghalaya, Arunachal Pradesh aser Bihar state tem nung tzünglu sashia arutsü, ta tekümdangtsü metetdaksüogo.

West Bengal nung tzünglu sashia arutsü akok, ta metetdakja India Meteorological Department (IMD)-i angopurtem dang taruba anogo pongu tashi Southwest Arabian Sea aser central Bay of Bengal-i angopui tziyimi maotsü metetdaksü.

"Arabian Sea aser Bay of Bengal nung mopung ghonda ka nung kilometer 45-55 nungi kilometer 65 tashi kera aontsü. Taruba anogo pongu tashi item tesem nung angopui maotsü tekümdangtsü osang metetdaksür," ta IMD-i X ajanga metetdaksü.

IMD-isa, "Jammu-Kashmir-Ladakh-GilgitBaltistan-Muzaffarabad, Himachal Pradesh, Uttarakhand, Punjab,

Haryana-Chandigarh-Delhi, Uttar Pradesh, Madhya Pradesh, Vidarbha, Chhattisgarh, Gangetic West Bengal, Bihar, Jharkhand, Odisha, Arunachal Pradesh, Assam & Meghalaya, Nagaland, Manipur, Mizoram, Tripura aser Telangana nunga tesem aika nung tzünglu sashia arutsüa akok," ta metetdaksü.

August 25 nungi August 27 tashi Assam aser Meghalaya na nung tzünglu kanga sashia arutsüa akok (115.6 mm nungi 204.4 mm tashi), anungji kümdanga alitsüla, ta IMD-i metetdaksü.

India Meteorological Department indang 'red alert' tetezü tzünglu 20 cm dak tema arutsü, 'orange alert' tetezü tzünglu 6 mm nungi 20 cm tashi arutsü aser 'yellow' alert tetezü tzünglu 6 cm nungi 11 cm tashi arutsü.

IMD-i Bengal aser Sikkim na atema 'Red Alert' sangdong aser Assam o Meghalaya na atema 'Orange Alert' sangdongogo.



TIR YIMYIM YIMOBILEM (EDITORIAL)

DIMAPUR

KÜPTOKNÜ

LUROI 26, 2023

MGNREGS inyakyim merüktetter

Tanü putu nungbo central government sentong tapu balala ajanga nübortem dangi senotsü teyari yokba ya department-tem ajanga masü saka teyari angutsü pur, beneficiary shia pa mesüra la account nung enoktsür. Iba jagi tetsüngda nung ketdangsertema mapa mepulur aser teyari angutsü pur indang senotsüa lalushipong mesüi shitak bank account-i aiter. Iba inyakyim atema teyari angutsü pur shia nungi Aadhaar card meshir, kechiyong iba jagi dang teyari agütsütsüba purtemji jangjar. Ajisüaka, Nagaland ama alima tila aser nütsüng ishika dang süaka, tangar memenep tsüket nung alirtem asünungji, nisung aika ket nung aadhar card maka aser item jagi aadhar card atemaji kanga nungdaksabo mebilemer. Iba jagi tang tashi, ashiko, Nagaland nungbo nisung aika aadhar card meyanglui alitsüa akok. Ibayongji, center government sentong nungbo Mahatma Gandhi National Rural Employment Guarantee Schemes (MGNREGS) ama nungi teyari agütsüba ya Aadhar card alirtem nem dang agütsütsü ta lateta liaka, asenok tia angateta tang tashibo Aadhar card maliyonga MGNREGS ajanga nisung aika teyari ngudagi. Atangji, Aadhar card ama ka nisung jangjatsü atema kuli ka mamshira, iba ama teyari angutsü langa malirtemia iba teyari agizüka agitsü. Ashiko, asen lima nunga Aadhar card ajak ket nung maliba tenüng atemer, asenok rongnunga karibo nisung tenüng tiyazü aika enoker MGNREGS teyari agia alitsüa akok. Ashiko, asenokbo kanga mekümdangji, iba ama senji arogo aser lokti-i dena agia kiojen yanglua alitsü akok. Iba jagi asenok rongsen nungbo takar akümer saka jakla aser ochi nung sensaker. MGNREGS nungi teyari agirtem dang masü saka Public Distribution System (PDS) nungi sensakertem nem seret nung senpak anasemka mesüra angati jangotsü agütsüba teyari angurtemjia, ashiko, aika takar tulurtem dang alitsüa akok, kechiyong relief jang alemdak jang abeni aoertemji tetsüng agi aoertembo züngteta dang saka gari nung aoertem teimba angutsü. Aji oda, relief jang alemba mapang Fair price shop kima reprangdangra, gari tajung aika sentsü ajak lashia anena angutsü. Itemji kechi koma Aadhar card ka amshia relief jangji agizükar tesüngmangtsüka lir. Asenok tangatetba aser ochi ashiba jenjang odangba seretji aji ka asütsü. Atangji, tanüa asenok rongnung karbo Aadhar card meyanglui alitsüa akok, ajisüaka joko tangar ita nung tua lidi asür aser alima nung alirtem raktepa tejakleni renloka aoer, anungji shingaia shinga matatsü. Aji oda, ibai Aadhar card mali ser tiyazü tenüng nung sen ishika aatsü merangba putu masü, ibajibo peisasa pei ashioksür asütsü. Joko, alima nung ya ochishia inyakba rongsen agir magima ser nisungtem lenmang balala nung yaritsü merangba putu lir. Iba ama putu ka nung asenokbo Aadhar card maliba tenüng amer asenoksasa asenok ashiocka ochimashi alitsü merangtsü na? Aji oda, ochishia meranga inyakba nungi bendenba rongsen agi makamait aser sensakertem yaritsü merangtepba putu ka nung, asenokbo gari bener sensakertem asoshi yokba relief jang agizüki aotsü na? Aji taaktsüka masü na? Iba ama shisatsü meindangba purtem kümzüksü asoshi tan August ita 31 nungibo Aadhar malirtem nembo MGNREGS nungi taa kecha meyoxtsü ta center government-i metetdaksüogo. Atangji, iba yagi asenok rongnung aika akoksatsüa akok, kechiyong angati sen aika ngua aliba mangu anentsü. Ajisüaka, iba takoksajibo mozü taku amai dang asütsü, kechiyong iba takoksa jagi lanu putu nembo tajangzük tulu bener arutsütsü. Tang yabo asenok aika pongmang lima nung alir ama alir, kechiyong pongmang nungang temeyonga mekürak takar akümer aser mapa meinyak shi ango den chiyonga pelateper. Aji oda, asangsang nungbo asenok taküm aser kibong tia tesensakba aser tamajungba kümdagi ta asenoki bilemdi. Aji oda, angati anguba sen agi asenok chirnurtem nungdak peritsüabajibo pongmang lima asütsü, kechiyong asangsang nungbo parnok tangatetba agi meperi taküm raksadagi. Aji oda, MGNREGS inyakyim merüktetba den külemi asenok teka aser shisatsü dena merüktetra, asangsang nung asenok chirnurtem azükarua alitsü.

OLEMSABANG

Aor Khristantem Apusoang

M. Meren, Ex. Pastor Ungma

(Yashi adok nungi...)

Saka ano telong nung alirtem arishidang tema nung alirtemang khuret tulu ajurua aodang 1964 kum Wokha Town nung NBCC Mungdang tulu sentep, idangji Mungdang aser Arogo lenirtemi anir alima tia yagi matemtsü aser Naga nunger teküp-tesü agi matitsü aser oda oda Nagalima ya samatsü aser aji India nunger nukjidong lir, anungji telong nung alirtem o India nunger na tsüngta yimjung lapoktsü bushiti ta ser tashi ajak agi meranga Peace Mission nisung asem shimteta yutsüba parnok den NBCC lenir aser ABAM tenzüker longjumer meranga inyakba ajanga iba kümjisa India nunger o Naga nunger telong nung alir na tsüngta 1964 Sept 6 nung yimjung lapoka tanü tashi iba yimjung nungji asenok lia aor. Asen jakdang aliba Arogo lenirtemi yamaji mapa tajung tasü itta inyakba ajanga tanü asenok yimjung nung lidaktsür.

Asen tsürabur mapang nung asen tetsü-tebotemji kecha maka sensaker timba oda asenoki inyaktetba kecha maka nung alu arütsü NINOK Manipur lima nungi dang aben, nok-nü timba Manipur lima nungi dang bena amshi, Aor konang sobutsü, shiret-Shibu, Lakup-molung, Azük tapu ajak, Rong sentsü balala temerem aser tanak ajak par lima nungi dang bena amshi, Jang Manipur jang tajungba alia chiyung, Ngashi aser Angokong Manipur nungi dang bena achi, Naga lima School ajak shibanger tazüngdak maka anungji Imphal nung, Ukhrul nung, Tangkhul lima dang oa zünga Aor tashir aküm sürabang Aortem kechiba Manipur Aiatai asoshi ola matoker? Parnokjia na aser ni ama shi azü atenba purtem lir aser ajakji asen adianu masü no? Yisui ashibabo tsukchir dang pei ama meimang ta, pei kiyonger dang pei ama meimang ta, pei dangbo pi taoba ta bilemang ta shia aliba lai tekong to asen Aor asoshi menungdakra item tekongtemji shizüka endoktsüla. Kechiba pei kiyongertem aiatai tia nung amang sangwa maka talidak maka, tachi-tajumtsu maka pei kinungtsü aser kinungbo tepseta endoker tanur temesür mali, kar tanur ka ana aliba tepseta endoker, kar kibung ajunga leperi yoker telushidak maka alibapurtem bilemdangang, ayawara tepoker nisungtem sümar, Tenla ki maka aser sentep anir mali, School maka item amala kiyongertem asoshi Aoli Arogotemi nüktzü yima kwiben sarasadem ayongzüker? Parnok asoshi Aor Khristan kwikati nüktzü kwiben yimtoker?

India P.M-i Kuki nunger asoshi ola matoker na? iba atema nungsen agüja jembia melili, Manipur Chief Ministeri Kuki samatsütsü pa nukjidong na? Aji asoshi nungsen agüja tejumbi, ano Naga nunger Chief Ministeri Meiti nunger asemer na aji asoshi pa nem nungsen tagütsü, ano Naga nunger MLA kwikati Meiti nunger asemer ta ola atoker na? Ajia odang tokjang aser Naga nüchiso bushirtemi Naga nunger ta asüba ajak longjumer süra Manipur Naga nunger asoshia kechi ashir? Saka ajia nungsen agüja tejumbi, kechiba item amala meputep atokdakja nungsen o jembir? Tang mapang pa majung pa majung ta jembia apotangshitsü mapang masü iba jagi kecha makümtsü, saka shiba ket nung kin aser yimli aser chuba tashi ajak ammeta lir, Pa dangji Ao Arogotemi nüktzü yima hapta kashidanga melumitetsü no? Nenevi chubai chuba sobutsü ajak sepzüka yur süjen abener ali nung amen aser pa nuburtema yamaji pa ama amentsü, shirurutema kasa lumidaktsütsü asoshi anogo asem ayongzük idangji Tsüngremi melangzü no?

Anungji Ao Khristantem, ordain ministertem, Ao Pastortem, Ao Deacontem pei tetushi sobutsüji khen agizüka yuang, nenok tetushi akhumji khen ali nung yuang, aser Nenevi nunger ama ali nung mener nüktzü yima aout mezüa Manipur aiatai ken tena taku tia nung alitem asoshi Elia Tsüngrem dang, Temerem tzüyim kongdaktsüba Mosa Tsüngrem dang aser Yordan ayong kongdaktsüba Yihusua Tsüngrem dang hapta ka ayimtentü memulonger no? P.M. dang tashi tuluba, C.M. tang tuluba nok-nü mamshie tongpang chirepdaktsüba Tsüngremji asem Tsüngrem masu no? Arung, Ao Arogopurtem nok-nü mamshie Jeriko longtsuki jirepdaktsüba Tsüngremi Kuki nunger asemtsu asu Meitei nunger asemtsü? Asenoki o mebendangli saka Kotaker rarar nokinketer tulutiba Maikel jagi Meitei nunger asemtsü asu Kuki nunger asemtsü aji Kibubai o bendangtsü, anungji asenokbo Manipur nunger rongnung yimjung adokdakjang ta dang sarasademtsü Ao arogopurtem ayongzüker. Kechiaser iba ya Hindu yimsü o Khristan yimsü na tongpang masü no? Amangbapurtem, tongpang ana nungji shir tsütsü atentsü? India ajunga nung Khristan Stateji Nagaland dang masu no?

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Laishibai tuyuba Arogo angazükshiyim sentong agiogo



Impur, Luroi/August 25 (TYO): ABAM Church & Mission ajanga ayongzüka maneni Zone 1 & 2 asoshi Laishibai Tuyuba Arogo Angazükshiyim sentong August 25, 2023 anogo nung Impur nung kanga takok ngua agiogo, ta ABAM Executive Secretary, Rev. Dr. Mar Pongener-i sangdong ka ajanga metetdaksü.

Okilaba mapang nung Rev. Dr. Mar Pongener Executive Secretary, ABAM ajanga ashiba agi, iba sentong ya tanü Arogotem nung Lai tesayuba nung mamendakba agi ta masü, saka Arogotem ajak nung tenzükba wadang nung amalitepa aser lirumedema tebandang kecha makai shilem agitetba Arogo asütsü atema tali angatetsütsü nükla nung agir, ta

metetdaksü.

Iba sentong nung Shisalen sayur Rev. Temsüwati, Associate Pastor, MTBA liasü. Arogo 35 aser Fellowship 3 nungi tenzükertem ajak agi 142 arua iba sentong nung aden.

Tsüngremi maneni Arogotem nung amalitepa tenzükba aodang Tsüngremer wadang tali tuluba inyaka aotsü sarasademer.

MP nung police-i Arogo 40 nem asüngdangyaba shidi agütsü

Hyderabad, August 25 (Agencies): Madhya Pradesh state kübok Indore nung police-i Arogo 40 nem asüngdangyaba shidi yokogo; iba shidi nungji tasüngdangba aika lir.

Madhya Pradesh state sorkari Khristantem indang osang metetpelabaji ajanga Hindu yimsü alia amangertemi Khristantem amaksüa akok, ta Khristantem tsübur.

Arogo lenirtemi ashiba agi, tasüngdangbatem nungji tashishitsü keta lir, kechiyong itemji Khristantem dangi dang yok.

B r i h o s t i b a r n ü osangbenertem den jembidang Indore Catholic Arogo nung tongti putir, Chacko Thottumarickal-i, "Onoki police commissioner den tongtepratepogo aser pa dang iba tetuyuba nung ya tashishitsü keta lir aser iba shidi ya bendanga züngshiba lir, ta shiogo. Kechiba Khristantem dang?" ta asüngdang.

"Shidi nung keta aliba tasüngdangbatem nungji melung malemtsüsa lir," ta pai ashi.

Assistant Commissioner of Police, Information Centre of Indore-i tasüngdangba onük 16 metetdakja lir aser police stations ajak dang ita asem tsüngda yimti nung Khristantem inyaksangshiba osangtem bendentsü tuyuogo. Ibaji ajanga Tenla ki aika shibangogo aser aikati online ajanga dang tekülem sentong nung adener.

Osangbener den jembidang Khristan kati, "Police commissioner-i item tetuyubaji agienogo, ta ashir, ajisüaka police-i maneni Arogotem ajurua kasa osangtem metetpelar aser pastor tem dang document nung alibaji fill-up asütsü tuyur," ta metetdaksü.

Police-i Khristantemi osangtajung prokba aser tanga maparen balala inyakba

osangtem bendener; iba maparen tenzükba mapang nungi Arogo aikati Tenla ki shibanger online ajanga dang tekülem sentong agi tenzükogo, ta kasa osang ajanga metetdaksü.

"Item osangji Khristan anemertem den lemsatepsüa akok aser parnoki Tenla kitem amaksü. Iba maparen ya ajanga police aser Hindutva teloktem amalitepa inyaker, ta temaitsü sayur," ta kasa osang ajanga metetdaksü.

Tasüngdangbatem nungji Khristantemi inyakba maparen balala indang nükjidong asüngdangba den külemi Arogo lenirtemi tangartem tamangba yimsü meyipdaksüba indang asüngdanga lir. Arogotem jagi melungtet telok (NGO) kar tenteta lir asü mali aser parnoki bendanglen nungi senotsü angur asü mangurar asüngdanga lir.

Khristantem aser osangbenertemi Indore Police Commissioner, Makrand Deoskar den iba tetuyuba osang metetpelaba sülen pai, notice ji yimti nung aliba police station ajak nung station house officers nem dang agütsü, ajisüaka police officers-i aibelena notice ji Arogotem nem-a agütsü asütsü akok, ta ashi.

Deoskar-i, "Khristantemi ashishiba sülen notice ji agienadokogo. Onoki Khristantem nembo notice ji magütsü," ta metetdaksü.

"Iba shidiji ACP [Assistant Commissioner of Police]-i züluba lir aser TIs [police tongtitem] nem agütsüba lir. TIs-i aibelena shidiji Khristan missionary kar nem agütsü asütsü akok," ta pai ashi.

"Tamangba yimsü meyipdaksüba dak sendakba nung tensa raksaba tatalokbatem lir, anungji item osangji tejangja bendena iba tebilemtsü bentettsü atema onoki inyaker," ta paisa shisem.

Indore nung Pastor Baljit Singh-i, "Ozü Arogo nem iba notice agütsüba sülen nungi Arogoi mimshia dang tekülem sentong agidar. Amongnü onok Tenla kidang madenshir. Tensa mesüngjem tashi onoki online ajanga dang tekülem sentong agütsü," ta metetdaksü.

Tesüiba hopta ishika tsüngda Tenla ki kar maakogo aser Khristantem anema apusodaksütsü nükjidong nung osangbenertemi osangtsüsang tai proker, ta pastor-i ashi.

Pastor Singh-i, "Khristan lenirtemi Arogotem dang kanga kümdanga alitsü aser tensa mesüngjem tashi lokti adenshia tekülem sentong magütsü metetdaksüogo. Tangbo tongti Arogotem nung ang adenshia tekülem sentong agir, ajisüaka Arogo tilatem aser home churches-ibo online ajanga dang tekülem sentong agidar," ta metetdaksü.

Ano külen tanga osang ka ajanga ashiba agi, taküm December ita nung state assembly elections agütsü aliba ajanga lokti nung telemsa adokdaksütsü nükjidong nung kari Khristantem anema inyaker.

"Parnok yimsütsüba ajanga nüburtem kanga takoksa nguogo. Police, osangbenertem aser Hindutva pusemertemi parnok tebilemba ataloktsü atema osang tai proker aser Khristantemi tangartem Khristan yimsü dangi meyipdaksü ta tiyazü nung tai tongloktsür," ta kasa osang ajanga metetdaksü.

Tang alima nung Khristantem alitsü atema linük tamajungtiba 50 rongnung India ya jenjang 11buba nung lir (Christian support organization Open Doors' 2023 World Watch List).

2013 küm nungbo iba List nung India jenjang 31buba nung ang liasü.

ANOGO ABEN TSÜNGREM DEN

Iba jagi kü nütsüng ta ajaki metettsü

"Ozüng tasen ka ni nenok nung agütsür"

(Yh. 13:34).

Khristan yimsü mezüng India nung anüdokleni bener arudang tamangertem tasen jagi sentong balala yanglua liasü. Kenü sentep tuluka tagidak nung milen ajak sepadok ta ashir. Iba mapang nung petsaperong tulu adoktsüsa asü, saka aji ta matalok, tesangwa meyipa maru tashi telok ajak ken tena tiptema ata. Ya angu dang sentep nung atener kati yamai zülu, "Iba telok yimya tajung ngur khristan masür tesemdanger aika kanga süngmang." O agi masü, taküm yimya ajanga iba telokti yagi Khristar nütsüng asüba küli agütsü.

Nisung shia ya nütsüng ka ka lir ta ashitsü akok, kechiyong asen tebilemba, mapa, libaliro nung tesayuba kar anitaker. Saka, ajak kasa tesayur ka indang nütsüngtem masü. Alima nung tesayur balala lir aser parnok nütsüngji yimya libaliro mesüra külemküja tentet ajanga metetter. Ni ya Yisu nütsüng lir ta ashitsü akok, saka kü mapa aser taküm yimya nung Yisu tesayuba temaitsü melira, tiyazü tenung agir ka dang asütsü. Asenok sasa tepang agi mashiyonga, alimai asenokji Yisu nütsüng ta jangja jangjaa metettsüsa Pa tesayuba aser tsüngsü nung jajadi.

Myanmar nung Arogoi asentenshir yimjung atema ayongzüker

August 25, 2023: Myanmar Pekhön, Hakha, Kalay aser nung Catholic Arogo nung Mandalay nung aliba Cardinal, Charles Maung Bo-i Arogotembo kongshiogo.

August 23, 2023 nü United Nations Security Council-i

Myanmar nung sepaitem dang linük nung rara anentsü atema metetdakja liasü.

UNSC-i sangdong ka ajanga, "Tesüiba ita ishika tsüngda Myanmar tesem balala nung rara adokogo. Civilian tepsetbaji onoki sashia aitsür, talisa anünglen nungi maneni amakba aitsür. International özüng akhümtsübuttsüla aser civilian kümzüksüla," ta metetdaksü.

Tang Myanmar nung nisung million 18 dak temai teyari prangpong aser injang ajanga masü saka yimjung dang lir," ta Cardinal Bo-i ashi.

"Tanü Myanmar nung Catholic bishop ya yirua liaka taneptsür ka. Putir kaji samtüker akümtsü atema yimjung yanglur

ka asütsüla; teimla aser security agütsür ka asütsüla," ta Bo-i ashi.

Myanmar nung nütsüng million 54 shi lir aser iba nungjagi shilem 1 dang Khristantem lir.

Myanmar nung rara ajanga Pathein nung aliba Arogobo mekongshi saka Loikaw, metetdaksüogo.

**AO OSHI ANGAZÜKDAK:
TANÜ ANGAZÜKTSÜBA OJANG**



Tir Yimyim

Rüök

- (v) ajem tapok nung ang enoktsüba (thread a needle)
- * Tenük majungertemi ajem nung ang rüoktsü makoker.

Rüök

- (v) aziök (disciplined)
- * Tsüraburtemi asenok sobaliba nung kanga junga rüök.

OLONG PAITEP # 6617

1			2		3		4		5
6					7				
				8		9			
	10								
									11
			12		13		14		
15							16		
17					18				

TIPIEN

- 1. Mosai züluba kaket ka - (6)
- 4. Teku nembangba sobutsü - (4)
- 6. Puteper - (4)
- 7. Kidang atem yagi yanglur - (6)
- 10. Teputep - (9)
- 15. Aori yangluba aon ka - (6)
- 16. Yirusalem - (4)
- 17. Per tulu - (4)
- 18. Ambangyima agiadok - (6)

LANGTSÜNGLEN

- 1. Junger ta ashi - (5)
- 2. Kenüa mati - (4)
- 3. Tulu masü - (4)
- 4. Yashi o asüng na yongtsü - (4)
- 5. Ajurutepdak - (6)
- 8. Amtak - (3)
- 9. _ _ _ en - (3)
- 10. Na shiba - (6)
- 11. Amo-amor - (5)
- 12. Noklang nung 97 endok - (4)
- 13. Kidong ka - (4)
- 14. Tekong sobutsü - (4)

OLONG PAITEP # 6616 TELANGZÜBA


TIPIEN:

- 1. Yiar, 3. Tesola, 7. Yimra,
- 8. Tangar, 9. Peria, 10. Tanur,
- 11. Tasen, 13. Lemjem, 15.
- Tambu, 16. Khuret, 17. Sang.

LANGTSÜNGLEN:

- 1. Yimti, 2. Amen, 4. Shiner,
- 5. Alaka, 6. Satan, 9. Putet,
- 10. Tembar, 11. Tatok,
- 12. Amang, 14. Jala.

**NAI-A YA METETTER MA
MOSES BRIDGE**



Asen nüburtem teimbaka azümesenba ajanga kechisarena aikabo mepurateter dang ashi, pi bendang linüktem nungbo minute dang masü second kajia kangasa senti ama bilema langka tajanzük asoshi amshir. I ba yongjiang tangari meinyaktetba mesüra mepuratetba kechisarena aika parnoki purapiteteter. Netherlands lima 'Moses bridge' ta ser tanga apu dang nungi khenyongi yimya balaka nung yanglua aliba idagi noksa nung angur. Koda jangratemsü!

+ + = 30 I ba
 + + = 22 ongko
 + + = 16 ya
 x + = ? inyakdangang

BJP, UPPL & BPF züngsem 900 temai Congress nung aden



Kokrajhar, August 25, 2023

(Agencies): Hokolbarnep Assam kübok Kokrajhar nung BJP, UPPL aser BPF züngsem 900 temai Congress party nung denogo.

Assam Pradesh Congress Committee (APCC) president Bhupen Borah lia parnok Congress nung aden.

Congress nung adenertem rongnung UPPL vice president Moinul Haque dena lir.

Kokrajhar nung Congress tashitaiba kümogo aser lanu putu-i Congress sakloker, ta Borah-i ashi.

Bodoland Territorial Region (BTR) nung auyaba aser tashiyim inyakba agi süngogo aser iba ajanga terenlok mali, ta paisa ashi.

"BTC chairman Pramod

Boro indang tongtipangtiba mapaji pa atema sen anguba lir. UPPL ajanga tiyazü tenangzükbatem agiogo. Parnok kasa terenlok aser kasa temeten indang jembia ashioktsür" ta APCC president Bhupen Borah-isa ashi.

BTC chairman Pramod Boro-i Bodoland movement mapang "Divide Assam 50/50? yimyim ayim saka tangbo pai BTR nung "Divide Money 50/50" policy inyaker ta paisa ashi.

"Tang BTR sen tasadang ka Pramod Boro aser tasadang ka Dispur-i aoer. Boro-i Bodoland atema rara saka tang pai Bangalore aser Delhi nung kimung aliogo. BTR nung ochimashi aika lir anungji BTR nung alirtemi tarutsü anogotem Congress dangi meyiptsü ta

Borah-isa metetdaksü.

Taruba Lok Sabha elections nung Congress-i Kokrajhar Lok constituency nungi candidate tajung ka yoktsü ta paisa shisem.

Kokrajhar nung aliba BTC Secretariat nung Bora-i Bodofa Upendra Nath Brahma indang kürakyanglu nem tetushi agütsü.

Bodofa Upendra Nath Brahma ya Bodo nunger tongtipang lennir ka liasü aser pai Bodoland state balaka meshia rara. Pa ya Bodoland movement tebu ka ama züngshir.

2003 km BTR tentetba nungi Congress-i khen danga yimsü mesüdangi arur. BTR nung tang Pramod Boro-i aniba UPPL ajanga yimsü asür.

Railway ministry-i Mizoram apu chirepba bushisüngdangtsü

Aizawl, August 25, 2023

(Agencies): Mizoram nung apu chirepba lendong bushisüngdang asütsü atema Union Railway Ministry-i high-level committee ka tentetogo.

August 23 nü Sairang nung under-construction railway apu chireprang nisung 23 tashi asü.

High-level probe committee ya BP Awasthi, PED-II, RDSO ketdangsüba nung asütsü.

Iba luden nung Associate dean & Professor of structural engineering at IIT-Delhi Dr Dipti Ranjan Sahoo, Professor of bridges at IRICEN Sharad Kumar Agarwal aser Chief bridge engineer at Northeast Frontier (NF) Railway Sandeep Sharma nunger dena lir.

Parnoki ita ka tsüngda bushisüngdangba asüba sülen osang agütsütsü mapang latettsüogo.

Young Mizo Association (Central YMA) central committee ajanga Sairang nung under-construction railway bridge chirepba lendong bushisüngdangtsü atema takhangba ka agütsüogo.

Central YMA-isa apu yanglurtem ABCI aser Silchar nung amenoka aliba BBJ companies dang tasür kibongtem nem teyari agütsütsü shiogo.

Assam nung Oct 2 nungi tzü litre 1 teküpok bottle mangutsü



Guwahati, August 25, 2023

(Agencies): October 2, 2023 nungi Assam nung 1000 ml capacity teküpok plastic water bottles mamshitsü ta Assam Environment and Forest Department-i metetdaksüogo.

"Single-use plastic (SUP) items ajanga lipoküm raksatsür aser temang atema lendong bentsür arur. Iba tetuyuba ya

October 2, 2023 nungi mapa kümä tenzüksü aser Urban & Rural local bodies, District Administration, Police department aser Pollution Control Board ajanga ketdangsüa repringtsü" ta sangdong nung shia lir.

Assam Chief Minister Himanta Biswa Sarma-i litre ka teküpok single-use plastic water

bottles noktangba osang sangoktsüba sülen tanü Department-i iba osang metetdaksü.

Tzü pongdang ama benshiba single-use plastics ka khen dang amshir endoktsüla. Item ya biodegradable masü anungji mapang talangka alir aser iba ajanga lipoküm nung timtem bentsür arur.

GOVERNMENT OF NAGALAND
DIRECTORATE OF HIGHER EDUCATION
NAGALAND: KOHIMA

NO.HED/SCHO/2022-23/

Dated, Kohima, the 25th Aug. 2023

**INFORMATION ON OPENING OF ONLINE SCHOLARSHIP PORTAL
FOR THE YEAR 2023-24 UNDER THE DIRECTORATE OF HIGHER
EDUCATION, NAGALAND, KOHIMA.**

This is to inform all the Students and Educational Institutions that:

1. The Online Scholarship Application for **Post Matric Scholarship for ST Students, State Merit & Research Scholarship** for the academic session **2023-24** will be live (active) from **28th Aug. 2023 till 31st Oct. 2023** via the State Common Scholarship Portal <https://scholarship.nagaland.gov.in>. The detailed guidelines/instructions for each Scheme will also be available on the portal.
2. Eligible students only from empanelled Institutions can apply. Institutions can download empanelment form from <https://highereducation.nagaland.gov.in>.
3. The Government of Nagaland, Department of Higher Education has issued revised guidelines for the State Merit & Research Scholarship vide NOTIFICATION order **No.HTE/TE/SCHO.21-8/2015, dated the 17th July 2023**. As per the revised guidelines, entry into the Scheme shall be allowed only in the first year of the course.
4. The Last date for online verification at the Institution level will be **30th Nov. 2023**.
5. The Last date for receiving hardcopy of applications and documents for Post Matric ST, State Merit & Research Scholarship for students studying outside Nagaland will be **30th Nov. 2023**.

Sd/-
Director
Higher Education
Nagaland: Kohima

Donald Trump apuba sülen pa indang 'mugshot' saya



Atlanta nung aliba Hartsfield-Jackson Atlanta International Airport nungi maodang taoba US tir Donald Trump-i osangbener den jembitsü arudang tangokba noksa nung angur.

Atlanta, Luroi/August 25 (Agencies): 2020 election results melenshitsu asoshi tasa yangluba nung tai tongloktsüba sülen Donald Trump Georgia nung bendanga agütsü aser taoba US tir indang mezüngbuba 'mugshot' (tepuokdak ayurtem tangokba noksa) tangoka liasü.

Pa indang ken o jembitsü ataba mapang Atlanta jail nungi chiochtsü asoshi Trump-i bail bond sen \$200,000 (£160,000) agütsü.

Iba sülen pai ken o ya taila lir ta ashi.

Mapa tamajung inyakba ken o ka nung ita pongu tsüngta pa apuba ibai pezümba alitsü saka police temi pua noksa tangokbabo tang mezüngbuba alitsü.

Mapang tatsüka lir Trump-i taoba mapang Twitter ta ajaba X nung post ka lemsatepa liasü, koba January 2021 sülen tang mezüngbuba alitsü. Pai pa indang website address aser mugshot den caption "Election interference. Never surrender!" ta zülur lemsatepa liasü.

America nung yimten yimsüsür aika apuba indang noksa den pa densema lir, kong Frank Sinatra, Al Capone aser Dr Martin Luther King Jr

nungertem liasü.

Pa anema ken o balala benoka aliba ya yimtenren nungi tenük yoka benokba lir, kechiaser taruba küm tir election nung Democrat nungi Tir Joe Biden den tokteptsü asoshi Republican telok nungti toktepertem rongnung pa jenjang tajungba lir, ta Trump-i ashi.

Tang teinyakdak mesüra taoba mapang US tir inyaka aliri mapa tamajung inyakogo ta tai tongloktsüba rongnung pa mezüngbuba alitsü aser pa New Jersey nungi pa jurila tayimtsü nung Brehostibar nikongdang arur ao.

Trump ya Fulton County Jail telung nung minute 20 shi liasü. Pa bukumer aika iba tesem nung adenshia liasü.

Jail indang website nung record tem lemsatepa nung Trump ya sentsü temesüng tebur, tar süklep trok inch asem, aser tuozük seret 97, kou sentsü 'blond' aser tenük sentsü tanen ta shia lir. Pa indang inmate number ya P01135809 liasü.

Pa kidangi meyipa maodang airport nung osangbener den jembidang, iba election result ashishitsu pa temeden lir, ta ashi.

"Election nung meshidak

mapa inyak ta ni bilem. Aser ni aji inyaksü temeden lir," ta 2020 election nung ashikülak mapa inyak ta kuli tejangja makai jembisang Trump-i ashi.

Georgia state nung election mapang tim masüba mapa inyak ta Trump den külemi nisung 18 anema ken o benok, kong Biden dang vote 12,000 dang tajemba agi Trump tsük.

Trump-i phone ajanga Georgia nung election ketdangsür dang ballot azüngba mapang vote 11,780 ya bushitetsü ashiba angashia liasü.

Trump anema ken o 13 benoka aliba nung tim masüba yimya nung shishilempaba, oath of office nung ketdangsür aibelendaktsüba, lenir ka ama alitsü tasa yangluba, ashikülak mapa inyaksü tasa yangluba aser kuli tiazü agütsübatem lir. Saka pai item taitsüba kata magizüker.

Hokulbar tashinung Fulton County Jail bushia arutsü totuyuba agütsüba ama pa den külemi tai tonglokja alir tesadang bo jelia arua liasü. Item rongnung taoba New York Mayor Rudy Giuliani aser taoba White House Chief of Staff Mark Meadows dena lir.

(Maneni tapak 8 nung...)

Greece morokmi adokaktsür nisung 79 puogo

Athens, Luroi/August 25 (Agencies): Greece nung morok mi adoka tesem aika rongdokba asoshi police temi mi senloktsür nisung 79 puogo.

Civil Protection Minister Vassilis Kikilias-i ashiba agi, Athens north-west tsütsü Mount Parnitha nung ano morok mi adokdaksütsü meranga liasü.

Iba morok mi ajanga tan hopta Greece nung nisung 20 takum samaogo.

"Nenoki linük anema mapa tamajung inyaker. Arsonist scum temi mi senlokja arem, ki o jen aser meimchir takum lendongi yoker," ta Kikilias-i Brehostibarnü television ajanga ajungbena jembidang ashi.

"Onoki nenok bushitetsü aser nenok mapa yari merenshitsu."

Greece nung meyi mapang morok mi adokba ya tang tasen masü aser scientists temi tzü mopung melenba ajanga morok mi ya adoker ta ashir.

Tzüngsang tali atsükba mesüra süngdong-lidong junga ketdang masüba mechi mi kaotsü tezüpaba kumdaktsür, anungji asaa mi senloktsüba mesüra danga maparen ajanga morok mi tekeraba nung jangrua aor, ta Swansea University nung Centre for Wildfire Research indang director Stefan Doerr-i ashi.

Police aser Greek intelligence service EYP ajanga item tatalokba bushisüngdang, ta osang ajanga ashi.

Greek sorkar odongtar Pavlos Marinakis-i ashiba agi, morok mi dak sendakba nung nisung 140 pua aliba nungi nisung 79 bo asaa mi senloktsüba dak sendaka lir.

Greece tesem ajungalen morok mi tesashi noklang dak tema jangrua aliba remseptsü meranger.

Honibarnü Alexandroupolis yimti anasa morok mi adokba ya EU nung tesashitüba kumogo, ta European Commissioner Janez Lenarcic-i ashi.

Kasa mapang Athens anasa Mount Parnitha nung aliba morok mi ya linük yimtiba anasa arem nung lir aser national park ka nung kongshitsu akok.

North-eastern Greece kübok Evros region anasa hopta tetenzüklen nisung tasü mang 19 ngutet aser item ya migrant tem südi ta amanger aser item rongnung tanurtem dena lir.

Hombarnü Boeotia region nung morok mi adoka alidak san anüker ka takum sama.

Taoba ita Greek nunger Rhodes asetkong nung morok mi adoka nisung meyririjang aika jena aotsüsa akum.

G20 senden nung Russia Tir Vladimir Putin madentsü

Moscow, Luroi/August 25 (Agencies): Ukraine nung tang teinyakdak military operation nung rangloktsü mechi taruba ita New Delhi nung amentsü aliba G20 Summit nung Russia Tir Vladimir Putin madentsü, ta Kremlin-i Hokulbarnü ashi.

Ukraine nung rara tenzükba sülen Russia Tir Vladimir Putin ya Samarkand, Uzbekistan nung 2022 SCO summit, Armenia nung Collective Security Treaty Organisation (CSTO) summit aser Astana, Kazakhstan nung Confidence-Building Measures in Asia (CICA) dak alaka linük balala adenshia senden kata nunga dena mali. Lokti tentet asem ya Russia-i yarir mesüra Russia-i tongti shilem agir.

Pai taoba küm Nusa Dua, Bali, Indonesia nung G20 Summit nunga maden aser South Africa nung BRICS Summit nunga maden, ajisüaka Johannesburg nung BRICS senden nung madenba yabo Ukraine nungi tanurtem pua bener aoba mechi March ita International Criminal Court ajanga pa aputsü

totuyuba agüja aliba ajanga lir. Russia Tir Vladimir Putin ya China nung October ita "One Belt, One Road" forum nungbo adentsü sentong lir.

Tang teraradak 2022 Russo-Ukrainian War anemba anüolen linüktem nungi lenirtem aliba mechi Putin-i linük balala senden nung adentsü nungnanger.

Putin-i Ukraine nung raraba asoshi US Tir Joe Biden, UK Ato Kilonser Rishi Sunak, Canadian Ato Kilonser Justin Trudeau, Australian Ato Kilonser Anthony Albanese, German Chancellor Olaf Scholz, France Tir Emmanuel Macron, Japan Ato Kilonser Fumio Kishida, Korean Tir Yoon Suk Yeol aser EU Council Tir Ursula von der Leyen nungertemi aitsür aser parnoki Putin aser pa den yariteper nem tenokdangba balala agütsütsü asoshi meranga inyaker.

G20 Summit nung Putin melen shiba adentsüar mejangja, saka Russian foreign minister Sergey Lavrov ya pa tenüng nung Bali nung 2022 G20 Summit aser Johannesburg nung 2023 BRICS Summit nung dena liasü.

National Sports Day nüngtem nung YRS-i athletic competition ayongzük



Director YRS&S, Kethosituo Sekhose-i Indira Gandhi Stadium, Kohima nung August 25, 2023 nung jembidang tangokba noksa nung angur.

Kohima, Luroi/August 25 (TYO): National Sports Day bilemteta Department of Youth Resources & Sports (YRS), Government of Nagaland ajanga August 25, 2023 nü Classes 8-10 nung azünger tetsür aser tebur kaketshir atema athletic competition ka Indira Gandhi Stadium, Kohima nung ayongzükua liasü.

Iba sentong nung jembidang, Hockey asayar tejen, Major Dhyan Chand nüngtem nung National Sports Day ya amunger, ta Director YRS Kethosituo Sekhose-i ashi.

Iba anogomung ya küm shia pa asoba anogo, August 29 nü amunger, saka Government of India-i state department tem dang August 21 nungi 29 tsüngta saisapong sentong mashi ka ayongzüktsü totuyuba agütsü.

Iba asayamung nung school ti nungi shilem agir, ta pai ashi.

Ajak asoshi iba anogo ya kanga tongtipang, kechiaser iba anogo nung asenok linük ka ama "Fit India" asoshi tali bendanga agütsüshir, kong linük nung aliba nisung ajaki temang anema alitsü aser linük nem konang tetushi bener arutsütsü asoshi saisapong nung shilem agir, ta pai ashi.

Indira Gandhi Stadium,

Kohima nung iba anogomung nüngtem nung 100M race, 200M race, High Jump, Long Jump, 4X100M relay race aser 4X100M mixed relay race ayongzükua liasü, kong G. Rio Higher Secondary School, Loyala Higher Secondary School, Don Bosco Higher Secondary School, Grace Higher Secondary School, Bethel Higher Secondary School, Mt. Hermon Higher Secondary School, aser Dainty Buds Higher Secondary School nungi Class 8-10 kaketshir temi shilem agia liasü.

Iba asayamung final result yamai alitsü:

100M Race Boys: 1 - Kekuosetuo Samuel, Loyola HSS, 2 - Peteruovi Mepfhuo, G Rio School, 3 - Henwabu Tep, Don Bosco HSS

100M Race Girls: 1 - Lonenu Khieya, Loyola HSS, 2 - Vizongunuo Chielie, Don Bosco HSS, 3 - Choyholü Veniuh, Dainty Buds HSS

200M Race Boys: 1 - Kekuosetuo Samuel, Loyola HSS, 2 - Zholozu Kemp, G Rio HSS, 3 - Mhasivikho Phira, Loyola HSS

200M Race Girls: 1 - Lonenu Khieya, Loyola HSS, 2 - Denloi Phom, G Rio HSS, 3 - Ajikuy

Yan, Grace HSS

High Jump Boys: 1 - Tsktisang Ponjen, Dainty Buds HSS, 2 - Chathavituo Solo, G. Rio HSS, 3 - Tialong Pongener, G Rio HSS & Ozhohu Kezo, Chandmari HSS

High Jump Girls: 1 - Kimeyetoli, Mt. Hermon HSS, 2 - Kedovono Peseyie, Dainty Buds HSS, 3 - Prescilla, Mt. Hermon HSS

Long Jump Girls: 1 - Chathangunuo Suokhrie, Grace HSS, 2 - Denloi Phom, G. Rio HSS, 3 - Kuvellü Kezo, Chandmari HSS

Long Jump Boys: Zhapu Rutsa, Loyola HSS, Vibeilie Vincent Solo, Don Bosco HSS, 3 - Shalozu Kemp, G. Rio HSS

4X100 M Race (Mixed): 1 - Loyola HSS, 2 - G. Rio HSS, 3 - Grace HSS

800 M Race Boys: 1 - Mhasivikho, Loyola HSS, 2 - Chathavituo, G. Rio HSS, 3 - Neikezielhou, Don Bosco HSS

800 M Race: 1 - Sentimongla, Grace HSS, 2 - Swuri, Mt. Hermon HSS, 3 - Vizhonu We-o

4X100 M Relay Race Boys: 1 - Don Bosco HSS, 2 - Loyola HSS, 3 - G. Rio HSS

4X100 M Relay Race Girls: Loyola HSS, 2 - Chandmari HSS, 3 - Grace HSS

18 buba Late Imtitemjen Memorial Table Tennis Tournament asayatsü

Mokokchung, 25th Aug (TYO): Mokokchung District Table Tennis Association (MDTTA)-i ayonga 18 buba Late Imtitemjen Memorial Table Tennis Tournament, September 6 & 7, anogo ananü yangi Multi-Purpose Sports Complex, Mokokchung nung asayatsü, ta MDTTA tir - Ali Walling aser tongti zülur - Takosunep Jamir nati sangdong ka ajanga metetdaksü.

Iba asayamung nung asaya telemsa yamai alitsü - Tebur kija & tarep (Men's Singles &

doubles), Tetsür kija aser tarep (Women's Singles & doubles) aser tetsür aser tebur arishi küm 19 aser 15 tekübok (boys & girls under 19 & 15). Tejangrartemi August 28, 2023 nungi tenzükua item dokan - Greetings Craft, Walim Enterprises aser Image Studio nungi registration form agizüktsü akok aser iba asayamung dak sentakba nung osang tejangjaba metetnürä, iba mobile number - 9436439033 nung tongteprateptsü asoshi MDTTA-isa metetdaksü.

23th Dr.T.Ao Inter District Football Tournament atema jangjashitsür: NFA

Dimapur, Luroi/August 25 (TYO): Tuensang District Football Association (T DFA) ajanga Tuensang nung 23 buba Dr.T.Ao Inter District Football Tournament ayongzüktsü aliba dak sendakba nung tejangja masüba osang kar prokshia lir, ta Nagaland Football Association (NFA) sangdong ka ajanga ashi.

Iba asayamung atema T DFA ajanga anogo ana benok, saka jelia sentong kar yanglur aliba mechi asüngdangba ama iba asayamung melitet. NFA Executives den T DFA nungi ketdangsürtem senden ka August 22, 2023 nü Reiphinyu Badze, Kohima nung mena 23 buba Dr. T.Ao Inter District Football Tournament atema jembishinüa liasü. Züngsem temi lenla ajak asadanger iba asayamung ya February 6, 2024 nungi asayatsü anogo lemtet, ta NFA sangdong ajanga ashi.

Kasa mapang Nagaland State Futsal Torunament ya 2023 küm October ita tatemen alitsü, koba Chümoukedima District Football Association (C DFA) ajanga ayongzüktsü aser iba asayamung atema anogo tejangja ya C DFA ketdangsür den shisa agitepba sülen ang sangdongtsü, ta ashi.

Kasa senden nung züngsem temi tejangja masüba osangtem prokshiba indang jembia liasü. Iba dak sendakba nung Association nungi sangdong agütsütsü asoshi ketdangsür tem den shingia tongtepratep masü, ta NFA ajanga ashi.

Tarutsü nung osangtsüsang agütsü asoshi osangbener temi NFA indang tir/tongti zülur mesüra joint secretary den tongtepratepa osang kaketa zünger tem memangmandaksüi osang tejangja adoktsü ayongzükter, ta sangdong ajangasa ashi.

Mkg nung 26 buba Inter-district & State Table Tennis Championship ayongtsü

Mokokchung, 25th Aug (TYO): Nagaland Table Tennis Association (NTTA) aküm nung Mokokchung District Table Tennis Association (MDTTA)-i 26 buba Inter-District & State

Table Tennis Championship 2023, October 23 nungi October 26, 2023 tashi Mokokchung nung asayatsü telemtetba agiogo.

Anungji, iba asayamung nung NTTA kübok aliba

district ajak nungi shilem agütsü pelaa shishia jaoker, ta MDTTA tir aser tongti zülur - Ali Walling aser Takosunep Jamir nati yokba sangdong ka ajanga metetdaksü.

Donald Trump apuba sülen pa...

Trump indang co-defendants rongnung Black Voices for Trump lenir Harrison Floyd ya Brehostibarnü tepuokdak pasasa aruba sülen bail agreement meyanglu yangji lir, ta court ketdangsür temi ashir.

Georgia judge ajanga ano co-defendant, attorney Kenneth Chesebro asoshi 'speedy trial request' agizükogoo. Pa indang ken o ya October 23 nungi tenzükua jembitsü.

Trump tepuokdaki arutsü

ghonda ishika lia pai pa indang defence lawyer Drew Findling melen veteran Atlanta criminal defence attorney Steven Sadow shim.

Trump bail nung chioka aliba mapang social media mesüra kecha nunga kuli alirtem mesüra co-defendants mesüa mezülutsü mesüra mejembitsü züngzüktepa lir. Pa indang okatsürtem dak alaka pai danga co-defendants shinga dena osangtsüsang agiteptsü memelar.

(Tapak 7 nungi...)

Georgia-i marudang Trump-i maneni iba ken o benoker Fulton County District Attorney Fani Willis maneni aitsü, shiba Democrat lir aser pai White House campaign raksatsütsü merang, ta Trump-i aitsür.

Atlanta nung nisung tepsetba aser azüdokshia mapa tamajung inyakba atema Trump-i pa indang Truth Social platform nung Wills tenüng asen aser nübürtem amtsük ali aotsüa tsübor, ta ashi.



Hangzhou, China nung asayatsü aliba 19th Asian Games atema Nagaland nungi Sepaktakraw asayar ana shimtetogo. Nagaland nungi tetsür ana, Sezovelu Dozo aser Seyiekhrieno Tapa nati Indian Women Sepaktakraw team nung shilem agütsü, kong asayar ti lir. Hoa nung ita ana National coaching aliba aser Bangkok nung anogo 45 coaching agiba sülen asayartem ya shimteta liasü. Indian Women Sepaktakraw team ya ano New Delhi nung special coaching camp ka agütsü aser Hangzhou, China nung 19th Asian Games atema aotsü, koba September 26 nungi October 9, 2023 tashi alitsü.

BILEMDANGANG

"Nü mangdang mezüngmeshirtem nungi na pila liang."